

Segun Vocero di Ministerio Publico:

Huez Comisario tin suficiente base pa prolonga detencion di sospechosonan den caso Holloway

ORANJESTAD (AAN) — Den e conferencia di prensa ayera atardi, relaciona cu e caso Holloway, e vocero di Ministerio Publico señora Vivian van der Biezen a

confirma e prolongacion di detencion di e dos personanan cu ta deteni como sospechoso den e desaparicion di Natalee Holloway, na Aruba.

Van der Biezen a splica cu diamars atardi Huez Comisario a tuma e decision aki cu ocho dia mas. Manera ley ta prescribi ayera nan a presenta dilanti di Huez

Comisario, kende a bisa cu e detencion di e dos personanan concerni a tuma lugar riba un base legal, y cu tin suficiente base pa tene nan ocho dia mas.

Segun'e esaki ta indica cu loke e Huez Comisario a trece dilanti ta suficientemente serio pa prolonga nan detencion. Parti di e investigacion cu ta tumando lugar ta e hecho cu e camara di hotel no a capta e hoben Holloway entrando hotel back, mientras cu e tres hobennan cu kendenan el a bay den auto a declara cu nan a bahe na hotel.

No obstante nan no ta worde considera como sospechoso pero solamente como testigo, y tin nada cu por impedi pa nan sali for di Aruba si nan dicidi di haci tal.

Señora van der Biezen a worde puntra riba e declaracion di e pareha di un di e dos detenidonan cu el a pasa henter anochi cune y cu e no tabata den e hotel. E vocero di Ministerio Publico a contesta cu si esey ta e caso e declaracion aki lo worde tuma door di e team investigador, y e ora ey lo worde evalua door di e fiscal y e team conhuntamente pa tuma un decision.

Mientras tanto e detencion lo worde prolonga te diaranzon otro siman, y si Fiscal ta haya necesario pone nan den libertad prome cu esey, e lo hacie, y si nan keda Fiscal lo tuma un decision tambe si tin base pa prolonga ainda mas nan detencion.